

A ruba

A antaño



Tempo cu e industria di petroleo a establece su mes ariba Aruba cu su prome bari di petroleo refina na aña 1927, despues cu Capt. Rodgers y su grupo canadiense a termina cu e construccion di e refineria, apenas Aruba tabata conta cu un poblacion di 8 mil habitante.

Una vez cu e refineria a cuminsa draai, tambe a cuminsa drenta for di casi tur e isla nan den Caribe, e caribense nan pa traha den e refineria. Nos propio hendenan a bandona nan trabao den cunucu y esun riba laman pa gana un dos centavito mas.

Un mei siglo despues di e refinacion di e prome bari di petroleo e poblacion a crece te yega na un sesenta mil. Y den apenas dos aña despues di e refinacion di e porme bari tambe Aruba a yega na conoce fuera di esun di PanAm su prome caya asfalta. PanAm despues a bira Lago Oil & Transport Co.Ltd. di Standard Oil of New Jersey y cu ta Esso cu despues tambe a bira Exxon.

Nos pueblo tabata depende riba awacero, su regenbak, y hasta su vena, cu e bapor Simon Bolivar cu mester a trece awa for di e rieuw Mississippi pa e dos mil y pico di americanos cu tabatin den colony, y di cual e ocupantenan cu a bini Aruba pa traha tambe, mester a depende di e awa aki, cual nan tabata haya na e main gate, y su sucu klinker pa su koffie preto. Pero dos aña despues a cuminsa e trabao di waterleiding, den cual tambe e planta di desalinacion di e awa di laman a bira esun mas grandi di mundo.

Den tur e cambionan di e tempo di antaño, un cos a keda permanente, y esey tabata su limpieza y su bunita. (Awendia nos por papia di uno pero no di e otro)

Aruba for di tempo di antaño ta recibiendo cambionan constante y hasta te na e punto caminda hopi awendia ta considera esaki un poco preocupante. Con por ta?

Pa ilustra un tiki di e comienzo di Lago, e foto aki ta di e fabrica di azufre di Lago banda di 1930, y cu den e ultimo añanan di Lago nan a dempela un parti di lama (reclaimed land) pa construi uno Hydrodesulferization Plant cu a costa millones di dollar.

Di e azufre tambe tin su chiste, ya cu den un di e casnan den colony ocupa pa un arubiano cu a invita un americano pa bin come na su cas, y ora cu esaki a mira e bol'i funchi, el a confundi esaki cu e azufre, cu tambe parece hariña geel.